

INUIT ATAQATIGIIT INATSISARTUNI



22. juli 2021

UKA2021/109

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nersussuit puulukillu nujuitsut neqaannik ilivitsunik aamma affarnik nioqqutissat 1999-mi eqqussuinermi akitsuutaarutsinneqarnerisa sunniutaannik nalilersuinermik Naalakkersuisut UKA2022-mi saqqummiussinissaat pillugu Inatsisartuni aalajangiiffigisassatut siunnersuut¹. Nalilersuinermi ilaatigut akitsuutaarutsitsinermi ataatsimut piffinnilu suliffissaqartitsinikkut sunniutit kiisalu neqinik igaannariangorlugit sulianik eqqussuisarnermut sunniutit ilanngunneqassapput. Taamattaq nalilersuinermi nunatsinni neqinik tunisassianik suliarinnittarneq annertunerulersinniarlugu eqqussuinermik killiliissutaasinnaasut qulaajarnissaat ilaatinneqassaaq.

(Inatsisartunut Ilaasortaq Mariane Paviasen, Inuit Ataqatigiit)

Tungavilersuut:

Ullumikkut neqissaqarnikkut inuunitsinni pinngitsoorsinnaajunnaarsimasatsinnut ilaapput nersussuit, puulukillu neqaat. Pisiniarfinni ulluinnarni annertuumik nunatta avataanniit igariaannangorlugit qeritereerlugit tikisinneqartarput, innuttaasunullu akigineqartarlutik.

1999-mi taamanikkut Inatsisartut nersussuit puulukillu nujuitsut neqaasa ilivitsut affallu eqqussorneqarnerani akitsuutip peerneqarnissaa aalajangerpaat. Taamanikkut Akileraartarnermut Ataatsimiititaliap pineqartoq pillugu isumaliutissiissummini, nersutit taamaattut neqaasa eqqussuinermut akitsuutaarunnissaanni, Kalaallit Nunaanni neqinik igaannariangorlugit

¹ Nioqqutissanik eqqussuinermi akitsuutit pillugit Inatsisartut inatsisaata allangortinneqarneranik Inatsisartut inatsisaat nr. 16, 30. oktober 1998-imeersoq

INUIT ATAQATIGIIT INATSIARTUNI



agguissarnerup pilerinarnerulersinneqarneratigut suliffissaqartitsinermik siuarsaanissaq siunertaasoq oqaatigaa.

Ataatsimiititaliap taamanikkut nunatsinni suliffeqarfiit 20-t missaat nersutit neqaannik eqqussukkanik suliarinneqqiisinnaasut missingerpaa.

Neqi A/S-imi ukioq naallugu suliffissaqartitiniarluni ilungersuuteqartarpoq, maanna savat, nersussuit amerlagisassaangitsut, tutut, toqorarneqarlutillu aggorneqarlutik, sinerissamut nioqqutissiarineqartarput, ilaatigullu umimmaat neqaanik agguinermik ingerlatsiveqarput, annertugisassaangitsumik qallersuusionermik ingerlataqarput.

Taammaakkaluartoq annertuumik pisiniarfinni nunatta avataanniit nersussuarnik, puulukinillu nunani allaniit tikisittakkanik nioqqutissanik tikisitsisoqartarpoq, takorlooruminarlunilu periarfissaalluaraluarpoq nersussuarnik puulukiinillu toqutanik ilivitsunik aggoriigaangitsunik tikisitsisalernissaq taakkulu Neqi A/S-miit igaassatut aggorneqarlutik, qallersuusiassartaat qallersuusiarineqarlutik nunatta iluani nioqqutissanngorlugit suliarineqartalernissaat angusariaqaripput isumaqarpunga.

Namminersuleriartornerpummi ilutigalugu nunatta iluani piginnaasat suliarisinnaasagut tamarluinnaasa suliarinnaalersariaqarparput, naalakkersuinikkut anguniagaasoq immitsinnut pilersornerulernissarput angutserlugu isumaqarpunga isumassarsialatsialaasoq minnerpaammik neqinik ilivitsunik tikisitsinikkut aqajaqqutsinnut apuunissaannut suliareqqinneq nunatta iluani pinnaasoq periarfissaqartorlu atorluartariaqaripput, igariaannagorlugit suliaaappata qallersuusiatulluunniit suliaaappata nunatta iluani suliarineqarsinaaneri periarfissaqarput.

Akitsuuteqarunnaarsitsinermi sunniutit nalilersorneqarnissaat maanna ingerlattariaqaripput isumaqarpunga. Tassunga suliniut suliffissaqartitsinikkut sunniuteqarsimanersoq, nunatsinnilu piffinni qanoq amerlatigisuni sunniutit

INUIT ATAQATIGIIT INATSISARTUNI



takussutissaqarnersut kiisalu suliniut neqinik tunisassianik allanik eqqussuinermit qanoq sunniuteqarsimanersoq ilanngullugit.

Nalilersuineq nunanit allanit nerisassanik igaannarianik eqqussuinermit killilersuiniarluta suliniutitta nanginneqarnissaanut tunngavissiillunilu nunatsinni suliffissanik tunisassiornermillu ineriartortitsinermit pitsaanersunik periarfissiisinnaavoq.

Qujanaq.

Pisortanut aningaasatigut allaffissornikkullu kingunerisassat:

Nalilersuineq AC-fuldmægtigip ukioq naallugu sulineranut naleqartumik ingerlanneqarsinnaasutut naatsorsuunneqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Soqanngilaq.

Innuttaasunut aningaasatigut allaffissornikkullu kingunerisassat:

Soqanngilaq.